



Mwinue Juu Mwokozi

Aliyefufuka

Lakini sasa Kristo amefufuka katika wafu; limbuko lao waliolala.—1 Wakorintho 15:20.

Muda ulikuwa umefika kwa Kristo kupaa, kwenda kwa kiti cha enzi cha Baba Yake. Kama mshindi wa Kiungu alikuwa anakaribia kurudi mbinguni akiwa na nyara za ushindi. Kabla ya kifo Chake alikuwa ametamka kwa Baba Yake, “Nimeimaliza kazi ile uliyonipa niifanye” (Yohana 17:4). Baada ya kufufuka Kwake alikaa duniani kwa muda ili wanafunzi Wake wamzoe akiwa na mwili aliofufuka nao wa utukufu. Sasa alifikia wakati wa kuondoka. Aliuthibitisha ukweli kwamba alikuwa ni Mwokozi aliye hai. Wanafunzi Wake hawakupaswa tena kuendelea kumhusisha na kaburi. Waanze kumfikiria kama aliyetukuzwa mbele za mbingu.

Kama mahali pa kupalia kwenda mbinguni Yesu alichagua pale alipokuwa akizoea kwenda alipoishi duniani.... Kristo alisimama kwenye Mlima wa Mzeituni, kwa moyo wenye shauku kuu na uchungu akiuangalia Yerusalemu. Vichaka na maponde membamba ya milima vilikuwa vimewekwa wakfu kwa maombi na machozi Yake. Miinuko yake ilikuwa imetoa mwangwi wa sauti za ushindi za watu waliomtangaza yeye kuwa ni mfalme. Katika miteremko yake ndipo alipopata makazi pamoja na Lazaro wa Bethania. Katika bustani ya Gethsemani, chini ya mlima huu alikuwa ameomba kwa uchungu mkuu peke Yake. Kutokea katika mlima huu ndipo alipaswa kupaa kwenda mbinguni. Juu ya kilele chake ndipo miguu Yake itakapokanyaga atakapokuja tena. Si kama mtu mwenye huzuni, bali mfalme mwenye utukufu na mshindi atasimama kwenye mlima wa Mizeituni, wakati haleluya za Waebrania zitakapounganika na hosana za Wamataifa, na sauti za waliokombolewa kama jeshi kubwa litakapoitikia kwa sauti kubwa, mvikeni taji Bwana wa wote! ...

Walipofika Mlima wa Mizeituni, Yesu aliwaongoza mpaka kileleni kukabili jirani na Bethania. Hapa alisimama na wanafunzi wakamzunguka. Miale ya nuru ilionekana kutoka katika uso Wake alipokuwa akiwatazama kwa upendo. Hakuwalaumu kwa makosa yao au kushindwa kwao; maneno ya huruma kuu, yalikuwa ndiyo ya mwisho kusikiwa na wanafunzi kutoka kinywani mwa Bwana wao.

Akiinyosha mikono juu yao katika kuwabariki, na kama anawahakikishia ulinzi Wake kwao, Aliinuliwa taratibu kutoka kwao, akitwaliwa kwenda mbingu kwa nguvu kuu kuliko uvutano wowote wa duniani. Alipokuwa akipaa, wanafunzi walioshikwa na mshangao walimkazia macho mara ya mwisho Bwana wao. Wingu la utukufu likamficha machoni pao na alipokuwa akipokelewa na gari la wingu la malaika maneno yafuatayo yakasikika, “Tazamia Mimi nipo pamoja nanyi sikuzote hata ukamilifu wa dhari.” Wakati huo huo wimbo mtamu kuliko zote ukasikika kama burudiko tulivu kutoka kwa kwaya ya malaika (Tumaini la Vizazi Vyote, sehemu ya 2, uk. 442 – 444).